



沈氏學攷序

當世著書家衆矣卑之則釋
官小說無當於世高之則出
入風雅祇以賞泉石而弄烟
雲其於宇宙間大問學大經
濟或多缺焉揚子雲有言人



以巫鼓非虛語也攜李沈司
寇執甫氏著學弋成走使函
書以序請余受而卒業歎曰
不亦善夫是編之作也厥有
三難苞括二儀蒐羅百代諸
人間不易購之書與不恒見
之事眉列胷分一覽畢舉博
難一大言包鴻蒙小言剖毫
末遐逝必摛幽隱必錄而其
指乃在翊常經周世故核難
二始展之如入武庫利鈍雜
陳究且索玄珠抽上駟割必

中窵射必中的非如異時類
書者流僅僅蒼藜罔所折衷
也者精難三益君自通藉以
來將以經營四方冀得一當
顧不得志乃退之山中左圖
右史於書無所不闕故其視
六合內事如視諸掌諸所著
述多矣今且垂艾復出此編
命之曰學歿其自言曰歿者
韜也藏也生平所學悉藏於
此諒矣諒矣抑余聞之古先
生無知求有知有知入無知

種種色色終不離言語文字
道固有進於此者予耄矣願
與君交勗之

大明萬曆辛丑春正月

賜進士出身資政大夫太子少
保禮部尚書兼翰林院學士
兩賜存問九十翁雲間陸樹
聲與吉甫題



沈氏學攷引

余自束髮以來三十年而釋褐十五年而挂冠茲
棲衡門又五年矣素有書癖日手一編寢食不廢
卽未能如惠施之五車安世之三篋與夫左史倚
相之所讀張華之所博而窮探冥搜揚其波必溯
其源采其華必拮其精凝滯者剖之二三者裏之
諸所端緒必得其要領而後已歲久成帙爲卷一
十有六爲綱二十有四爲目三百五十有八皆宇
宙內鴻鉅之事非草木鳥獸之類兒輩懼其逸也
爰付剞劂氏強而名之曰學攷攷者韜也藏也生

沈氏學考
平所學悉藏於此故以名焉 崑

大明萬曆歲次庚子仲秋望日

賜進士出身奉政大夫南司寇樵李沈堯中執甫

書于東郭草亭

男廷_廷校

沈氏學考總目

天文

天體

天樞天頂

上天下天

天主日

斗杓

日月左旋

日月食

五星

日月星宿諸占

日月五星行度分野

雲漢

天象變異

空空子

日月纏度

地理

地在天中

大九州

大五嶽

大四瀆

兩戒

崑崙

黃河原委

黃河九曲

江出吐谷渾

漢出徼外

海水不溢

潮汐

地中

中國五嶽

帝都

禹貢

周禮職方

春秋邦域

漢唐宋元疆域大明一統

水土風氣

洞天福地

天竺

釋迦方域志序

儀表

句矩論

渾儀

勾股

晷影

造化

天地混闢

萬物化生

五行

五運六氣

主氣客氣

六氣六神

鬼神

干支

納音

納甲

陽九百六

災異

時令

夏小正解

月令

歲本

風信水信

曆法

曆主日

冬至朔望

氣盈朔虛

曆數不齊

赤道黃道

清臺測候

授時曆 九条 大統曆 左傳失閏之誤

圖書

圖書方位 圖書並出 圖書異名

律呂

黃鍾 黃鍾長短辨 上生下生

五音旋相為宮六十調 變宮變徵

史記律書辨 半律清聲 律尺

候氣 備數

君道

正統 德運 正朔

丹書 創守 中興

臣道

臣道 社稷臣 忠臣

奸雄 朋黨

禮上

冠禮 太子即位禮 郊祀

五帝 明堂 禘祫

宗廟 同堂異室 支子立廟論

庶人祭于寢 社稷

禮下

釋奠釋菜

蒐苗獮狩

山陵

除殉

諡法

氏族

宗法

小宗辯

子夏喪服傳

三年喪

袒免辯

重譜

為人後

墓祭火葬

樂

律同合聲

論聲不論器

絲竹有自然之聲

四清聲

各器各具一音樂章

官材

封建

封建井田

學校

選舉

資格

考課

財用上

賦稅

貴粟

儲蓄

會計

西北水利

東南水利

河漕

海運

鹽鐵

錢幣

征權

救荒

財用下

農

虞

養魚經

工

商

兵

握奇經

射經

兵制

畿兵

文武一道

兵農

營田屯田

原十六衛

車馬

刑

刑法

盡心錄

治河

河淮分合

溝洫

備邊

西北邊防

遼東

山海關

大寧

薊州

黃花鎮

居庸

宣府

紫荆倒馬龍泉

大同

鴈門寧武偏頭受降城

河套

榆林

延綏

固原

花馬池

寧夏

甘肅

嘉峪關

燉煌

西寧

西南邊防

松潘

安南

東南海防

廣東

福建

浙江

蘇松

淮揚

廣福浙直會哨東北海防

登萊

旅順

朝鮮

經籍上

五經總論

易

易兼圖書

太極

先天後天

易統于乾

易主象

易具萬象

先天相對

後天反對

易有互體

太十三易

三墳

書

中星

殷人立嫡

微子不歸周

洛書非洪範

墳典索丘

今文古文

汲冢周書

詩

風雅之別

王風非降

鄭聲入樂

詩序不可廢

詩與易同

風雅正變

齊魯燕趙

詩多殘缺

詩貴取義

經籍中

三禮總論

周禮

冬官不缺

漢儒解經

儀禮

禮記

明堂位辨

春秋

三傳

左氏不盡出

明丘

春秋始于隱公

經籍下

論語

孝經

爾雅

孟子

緯書

經學有義有數

逸書

偽書

史籍

正史總論

國語

史記

漢書

漢紀

後漢書

後漢紀

三國志

續後漢書

漢晉春秋

帝王世紀

古史

晉書

宋書

南齊書

梁書

陳書

魏書

北齊書

周書

隋書

南史北史

唐書

新唐書

唐鑑

五代史

新五代史

資治通鑑

通鑑外紀

通鑑綱目

續通鑑長編

通鑑前編

大事紀

宋史

元史

宋元通鑑綱目

雜史

竹書紀年

戰國策

吳越春秋

越絕書

楚漢春秋

胡氏補遺

通志略

史通

治統紀畧

諸子

六家

儒家

道家

墨家 名家 法家

陰陽家 五行家 縱橫家

兵家 雜家

藝文

字學 假借轉注論 張懷瓘十體論

韻學 三十六字母 洪武正韻

文章辨體 古賦 樂府

古詩 律詩 詩餘

詞曲 雜體 繪畫

圖錄

方技

素問 醫學源流 大觀本草

銅人針灸圖 身中水火 卜筮

龜卜之法 龜經 陰陽老少

易學考變占 焦氏易林 箸短龜長

占夢 太乙六壬諸法天盤地盤

太乙九宮 太乙駕斗 六壬

遁甲 禽演 風角

六神課 葬經 堪輿說

祿命 相術

方外

僊

黃庭內景經

黃庭外景經

陰符經

參同契

參同契補遺

胎息經

食氣

金丹四百字

入藥鏡

規中指南

坎離龍虎

服丹藥

生人生仙

人身逆河

佛

心經

楞伽經

楞嚴經

金剛經

圓覺經

四十二章

維摩詰經

東土初祖

壇經

普門品

三世

三千大千

三乘

三無漏

六度

三身

觀世音經呪序



沈氏學發卷之一

樛李 沈堯中 編

天文

天體

天樞天頂

上天下天

天主日

斗杓

日月左旋

日月食

五星

日月星宿諸占

日月五星行度分野

雲漢

天象變異

空空子

日月纏度

天文

天體

古之言天者有三家曰蓋天曰渾天曰宣夜宣夜之制其亡久矣蓋天卽周髀其言天似蓋笠地法覆槃天地各中高外下北極之下爲天地之中三光隱映以爲晝夜蓋謂日在南爲晝在北爲夜也渾天卽璣衡其言天地如鷄卵天包地外如卵白裹黃周天三百六十五度四分度之一半露地上半在地下二端謂之南北極北極出地三十六度南極入地三十六度兩極相去一百八十二度半強赤道帶天之絃去南北極各九十一度半強夏至日去北極六十七度而強冬至日去北極一百一十五度而強春秋分去北極九十一度日月星宿斜而迴轉蓋言日在地上爲晝在地下爲夜也夫天體至圓周圍三百六十五度四分度之一北極居天頂之北猶如倚蓋元時四海測驗南海北極出地一十五度夏至景在表南一尺一寸五分晝五十四刻夜四十六刻衡嶽北極出地二十五度夏至日在表端無景晝五十六刻夜四十四刻嶽臺北極出地三十五度夏至晷景一尺四寸八分晝六十刻夜四十刻和林北極出地四十五度夏至晷景三尺二寸四分晝六十四刻夜三十六

刻鐵勒北極出地五十五度夏至晷景五尺一分
晝七十刻夜三十刻北海北極出地六十五度夏
至晷景六尺七寸八分晝八十二刻夜一十八刻
又北海日沒地僅十五餘度夕沒亥西晨出丑東
由斯以譚竊謂天頂在極南五十六度中高四下
四面各九十一度經星所纏爲赤道繞極而轉南
去天頂三十六度日月五星所纏爲黃道出入赤
道內外夏至日在赤道北二十四度去極稍遠出
寅入戌南上行六分北下行四分故晝長而夜短
冬至日在赤道南二十四度去極最遠出辰入申
南上行四分北下行六分故夜長而晝短春秋分
日在冬夏之中出卯入酉南上行五分北下行五
分故晝夜平故有謂北高而南下南高而北下者
非也有謂日月平轉與夫出入地中者亦非也由
漢以來主蓋天者十之一主渾天者十之九然主
渾天者亦據中國目力之所及而爲之耳北海所
見則北加而南減南海所見則南加而北減乃知
渾天蓋中國之儀而非六合之儀也

天樞天頂

河洛篇天中極星崑崙之墟後人皆以紐爲極星

自祖衡以璣衡窺考天極不動處去極星之未猶
一度有餘筆談又謂三度有餘蓋星移而極不移
所謂天之樞也天樞四外各九十一度乃是赤道
天樞南五十五度乃是天頂天頂四外各九十一
度乃是地衡赤道之子午先天之坤軋也地衡之
子午後天之坎離也赤道地衡子午各別知酉則
同

上天下天

天包地外地乃天中之一物秦始皇治驪山遣隸
徒七十二萬穿三泉深極不可入李斯奏曰治驪
山已深已極鑿之不入燒之不然叩之空空如下
天狀則上下皆天秦人已言之而天地相附之說
反有若知之未盡者何也

天主日

先儒言天體至圓周圍三百六十五度四分度之
一于何而知之于日行三百六十五日四分日之
一爲一歲而知之也日行三百六十五日四分日
之一爲一歲于何而知之于冬至晷影極短而知
之也又云天日繞地一周而過一度此又何以知
之于中星而知之也中星日過一度微有不足堯

時冬至昏昴中今冬至昏室中其言日過一度非也蓋由曆家以天為儀以天起數故日行每日筭退一度每月約纏一次歷十二月而與天會其實每日子時日在子位午時日在午位明日子時復還在子曷嘗一月一次若日日月合朔各有其次竊謂孟春日夜半日月皆在子月行遲每日退十二度有奇月退在亥日至亥與月合朔月退在戌日過戌與月合朔凡二十九日有奇月與日會亦會在子天無體以日月星辰為體中星既不可憑日纏亦非其實竊謂天文家于天儀之內重在日數而中星之過月行之不及酌其虧盈而消息之則曆亦可正而紛紛之論定矣此非余之臆說也堯典暮三百有六旬有六日以閏月定四時成歲此非重日歟而奈之何後人之不悟也然則天儀日數可並用乎曰可天儀以察機祥日數以定時歲二者皆不可缺故李淳風不重歲差之法而唐一行謂日與黃道俱差今既主日正不必謂日與黃道俱差寧謂天與赤道俱差可矣非真天之有差也天運不齊主日則天有差耳

斗杓

筆談正月寅二月卯謂之建其說謂斗杓所建不
必用此說但春爲寅卯辰夏爲巳午未理自當然
不須因斗建也緣斗建有歲差古者正月斗杓建
寅今則正月建丑矣又歲與歲合今亦差一辰堯
典曰日短星昴今乃日短星東壁此皆隨歲差移
也

日月左旋

周髀曰日猶火月猶水火則外光水則含景朱子
曰日陽精月陰精緯星陽中之陰經星陰中之陽
日爲陽故在晝光常滿月爲陰故在夜有形無光
日照之乃有光經星緯星有陽有陰故有光而在
夜又日月隨天左旋非獨宋儒言之也周書亦有
之書云天道尚右日月西移地道尚左水道東流
西移左旋之謂也天文家右旋之說乃是退數惟
以退數爲進數反謂日行遲月行速不知天行健
日次之月又次之漢黃香曰日蝕從西月蝕從東
無上下中央者月先在西日行追及故日蝕從西
月在天南過西日在地北過東故蝕從東以是知
日行之疾而月行之遲也或疑日與月爲地所隔
不能借光不知天徑一百二十一度四分度之三

地徑二十四度地徑北天空四十八度有奇日附天而行上下斜對地不能隔故謂日在地平之旁則可在地平之下則不可也

日月食

日食有常秦漢以前皆莫能先知禮曾子問孔子曰諸侯旅見天子入門不得終禮廢者幾孔子曰四請問之曰太廟火日食后之喪雨露服失容則廢夫火也喪也雨也皆不可先定也當時視日食亦猶此耳使先知之則當預有戒令朝不必入矣春秋書日食三十有六不徒曰日食而曰日有食

之則若真有物食之者君象而曰有食之記異也警人君也漢世始推月九道然猶未驗其所行之遲速也漢末都尉劉洪作乾象曆復推月行遲速然交食之法猶未詳著大抵朔望值交不問內外入限便食至陳世張賓創立外限然應食不食亦未能明惟隋張胄元獨得其妙以爲日行黃道月行月道月道交結黃道外十三日有奇而入經黃道謂之交朔望去交前後各十五度已下卽當食若月行內道在黃道之北食多有驗月行外道在黃道之南雖遇正交無由掩映食多不驗交食之

法至是始精又春秋書日食不書月食故史記云月食常也日食不臧也然日爲君象月爲后象內外一體所關不細于是月食而書亦可也但月掩日則日食猶易曉也月望日則月食古所未詳獨張衡云對日之衝其大如日日光不照謂之闇虛月望行黃道則值闇虛有表裏深淺故月食有南北多少所謂闇虛者火日外明其上必有暗氣是也

五星

星家言古曆五星並順行秦時始有金火之逆漢初測候乃知五星皆有逆行班氏亦謂三代盛時五緯順軌無逆行在周末人治不供五緯始先常度而有逆行在曆家以東行爲順西行爲逆若據左旋之說則周逆行正是順行也

日月星宿諸占

史記天官書中宮天極星其一明者太乙常居也旁三星三公或曰子屬後句四星末大星正妃餘三星後宮之屬也環之匡衛十二星藩臣皆曰紫宮前列直斗口三星隨北端兌若見若不曰陰德或曰天乙紫宮左三星曰天槍右五星曰天棓後

六星絕漢抵營室曰閣道北斗七星所謂旋璣玉衡以齊七政杓攜龍角衡殷南斗魁枕參首用昏建者杓杓自華以西南夜半建者衡衡殷中州河濟之間平旦建者魁魁海岱以東北也斗爲帝車運于中央臨制四鄉分陰陽建四時均五行移節度定諸紀皆繫于斗斗魁戴匡六星曰文昌宮一曰上將二曰次將三曰貴相四曰司命五曰司中六曰司祿在斗魁中貴人之牢魁下六星兩兩相比者名曰三能三能色齊君臣和不齊爲垂戾輔星明近輔臣親彊斥小疏弱杓端有兩星一內爲矛招搖一外爲盾天鋒有句圓十五星屬杓曰賤人之牢其牢中星實則囚多虛則開出天一槍梃矛盾動搖角大兵起

東宮蒼龍房心心爲明堂大星天王前後星子屬不欲直直則天王失計房爲府曰天駟其陰右驂旁有兩星曰衿北一星曰牽東北曲十二星曰旗旗中四星曰天市中六星曰市樓市中星衆者實其虛則耗房南衆星曰騎官左角李右角將大角者天王帝廷其兩旁各有三星鼎足句之曰攝提攝提者直斗杓所指以建時節故曰攝提格亢爲

疏廟主疾其南北兩大星曰南門氏爲天根主疫
尾爲九子曰君臣斥絕不和箕爲敖客曰口舌火
犯守角則有戰房心王者惡之也

南宮朱鳥權衡衡太微三光之廷匡衛十二星藩
臣西將東相南四星執法中端門門左右掖門門
內六星諸侯其內五星五帝坐後聚一十五星蔚
然曰郎位傍一大星將位也月五星順入軌道司
其出所守天子所誅也其逆入若不軌道以所犯
命之中坐成形皆羣下從謀也金火尤甚廷藩西
有隋星五曰少微士大夫權軒轅軒轅黃龍體前

大星女主象旁小星御者後宮屬月五星守犯者
如衡占東井爲水事其西曲星曰鉞鉞北北河南
南河兩河天關間爲關梁輿鬼鬼祠事中白者爲
質火守南北河兵起穀不登故德成衡觀成潢傷
成鉞禍成井誅成質柳爲鳥注主水草七星頸爲
貞官主急事張素爲厨主觴客翼爲羽翮主遠客
軫爲車主風其旁有一小星曰長沙星星不欲明
明與四星等若五星入軫星中兵大起軫南衆星
曰天庫樓庫有五車車星角若益衆及不具無處
車馬

西宮咸池曰天五潢五潢五帝車舍火入旱金兵
水水中有三柱柱不具兵起奎曰封豕爲溝瀆婁
爲聚衆胃爲天倉其南衆星曰詹積昴曰髦頭胡
星也爲白衣會畢曰罕車爲邊兵主弋獵其大星
旁小星爲附耳附耳搖動有讒亂臣在側昴畢間
爲天街其陰陰國陽陽國參爲白虎三星直者是
爲衡石下有三星兂曰罰爲斬艾事其外四星左
右肩膀小三星隅置曰觜觶爲虎首主葆旅事其
南有四星曰天厠厠下一星曰天矢矢黃則吉青
白黑凶其西有句曲九星三處羅一曰天旗二曰
天苑三曰九游其東有大星曰狼狼角變色多盜
賊下有四星曰弧直狼狼比地有大星曰南極老
人老人見治安不見兵起常以秋分時候之于南
郊附耳入畢中兵起

北宮玄武虛危危爲蓋屋虛爲哭泣之事其南有
衆星曰羽林天軍軍西爲壘或曰鉞旁有一大星
爲北落北落若微亡軍星動角益希及五星犯北
落入軍軍起火金水尤甚火軍憂水患木土軍吉
危東六星兩兩相比曰司空營室爲清廟曰離宮
閣道漢中四星曰天駟旁一星曰王良王良策馬

車騎滿野旁有八星絕漢曰天潢天潢旁江星江
星動人涉水杵曰四星在危南匏瓜有青黑星守
之魚鹽貴南斗爲廟其北建星建星者旗也牽牛
爲犧牲其北河鼓河鼓大星上將左右左右將婺
女其北織女織女天女孫也

察日月之行以揆歲星順逆曰東方木主春日甲
乙義失者罰出歲星歲羸縮以其舍命國所在國
不可伐可以罰人其趨舍而前曰羸退舍曰縮羸
其國有兵不復縮其國有憂將亡國傾敗其所在
五星皆從而聚於一舍其下之國可以義致天下
以攝提格歲歲陰左行在寅歲星右轉居丑正月
與斗牽牛晨出東方名曰監德色蒼蒼有光其失
次有應見柳歲早水晚旱歲星出東行十二度百
日而止及逆行逆行八度百日復東行歲行三十
度十六分度之七率日行十二分度之一十二歲
而周天出常東方以晨入於西方用昏單闕歲歲
陰在卯星居子以二月與婺女虛危晨出日降入
大有光其失次有應見張名曰降入其歲大水執
徐歲歲陰在辰星居亥以三月居與營室東壁晨
出曰青章青青甚章其失次有應見軫曰青章歲

早早晚水大荒駱歲歲陰在巳星居戌以四月與
奎婁胃昴晨出曰躡踵熊羆赤色有光其失次有
應見亢敦牂歲歲陰在午星居酉以五月與胃昴
畢晨出曰開明炎炎有光偃兵唯利公王不利治
兵其失次有應見房歲早早晚水叶洽歲歲陰在
未星居申以六月與觜觶參晨出曰長列昭昭有
光利行兵其失次有應見箕涪灘歲歲陰在申星
居未以七月與東井輿鬼晨出曰大音昭昭白其
失次有應見牽牛作鄂歲歲陰在酉星居午以八
月與柳七星張晨出曰爲長王作作有芒國其昌
熟穀其失次有應見危曰大章有旱而昌有女喪
民疾闡茂歲歲陰在戌星居巳以九月與翼軫晨
出曰天睢白色大明其失次有應見東璧歲水女
喪大淵獻歲歲陰在亥星居辰以十月與角亢晨
出曰大章蒼蒼然星若躍而陰出旦是謂正平起
師旅其率必武其國有德將有四海其失次有應
見婁困敦歲歲陰在子星居卯以十一月與氐房
心晨出曰天泉玄色甚明江池其昌不利起兵其
失次有應在昴赤奮若歲歲陰在丑星居寅以十
二月與尾箕晨出曰天皓黓然黑色甚明其失次

有應見參當居不居居之又左右搖未當去去之
與他星會其國凶所居久國有德厚其南動乍小
乍大若色數變人主有憂其失次舍以下進而東
北三月生天棊長四丈未兌進而東南三月生彗
星長二丈類彗星退而西北三月生天攬長四丈
未兌退而西南三月生天槍長數丈兩頭兌僅視
其所見之國不可舉事用兵其出如浮如沈其國
有土功如沈如浮其野亡色赤而有角其所居國
昌迎角而戰者不勝星色赤黃而沈所居野大穰
色青白而赤灰所居野有憂歲星入月其野有

逐相與太白鬪其野有破軍歲星一曰攝提曰重
華曰應星曰紀星營室爲清廟歲星廟也

察剛氣以處熒惑曰南方火主夏日丙丁禮失罰
出熒惑熒惑失行是也出則有兵入則兵散以其
舍命國熒惑熒惑爲勃亂殘賊疾喪饑兵反道二
舍以上居之三月有殃五月受兵七月半亡地九
月太半亡地因與俱出入國絕祀居之殃還至雖
大當小久而至當小反大其南爲丈夫北爲女子
喪若角動繞環之及乍前乍後左右殃益大與他
星鬪光相逮爲害不相逮不害五星皆從而聚于

一舍其下國可以禮致天下法出東行十六舍而止逆行二舍六旬復東行自所止數十舍十月而入西方伏行五月出東方其出西方曰反明主命者惡之東行急一日行一度半其行東西南北疾也兵各聚其下用戰順之勝逆之敗熒惑從太白軍憂離之軍却出太白陰有分軍行其陽有偏將戰當其行太白逮之破軍殺將其入守犯太微軒轅營室主命惡之心爲明堂熒惑廟也謹候此曆斗之會以定填星之位曰中央土主季夏日戌巳黃帝主德女主象也歲填一宿其所居國吉未

當居而居若已去而復還還居之其國得土不乃得女若當居而不居旣已居之又西東去其國失土不乃失女不可舉事用兵其居久其國福厚易福薄其一名曰地侯主歲歲行十二度百十二分度之五日行二十八分度之一二十八歲周天其所居五星皆從而聚于一舍其下之國可重致天下禮德義殺刑盡失而填星乃爲之動搖羸爲王不寧其縮有軍不復填星其色黃九芒音曰黃鍾宮其失次上二三宿曰羸有主命不成不乃大水失次下二三宿曰縮有后戚其歲不復不乃天裂

若地動斗為文太室填星廟天子之星也木星與
 土合為內亂饑主勿用戰敗水則變謀而更事火
 為旱金為白衣會若水金在南曰牝牡年穀熟金
 在北歲偏無火與水合為焯與金合為鑠為喪皆
 不可舉事用兵大敗土為憂主孽卿大饑戰敗為
 北軍軍困舉事大敗土與水合穰而擁闕有覆軍
 其國不可舉事出亡地入得地金為疾為內兵亡
 地三星若合其宿地國外內有兵與喪改立公王
 四星合兵喪並起君子憂小人流五星合是謂易
 行有德受慶改立大人奄有四方子孫蕃昌無德
 受殃若亡五星皆大其事亦大皆小事亦小蚤出
 者為羸羸者為客晚出者為縮縮者為主人必有
 天應見於杓星同舍為合相凌為鬪七寸以內必
 之矣五星色白圓為喪旱赤圓則中不平為兵青
 圓為憂水黑圓為疾多死黃圓則吉赤角犯我城
 黃角地之爭白角哭泣之聲青角有兵憂黑角有
 水意行窮兵之所終五星同色天下偃兵百姓寧
 昌春風秋雨冬寒夏暑動搖常以此填星出百二
 十日而逆西行西行百二十日反東行見三百三
 十日而入入三十日復出東方太歲在甲寅鎮星

在東壁故在營室

察日行以處位太白曰西方秋司兵月行及天矢
日庚辛主殺殺失者罰出太白太白失行以其舍
命國其出行十八舍二百四十日而入入東方伏
行十一舍百三十日其入西方伏行三舍十六日
而出當出不出當入不入是謂失舍不有破軍必
有國君之篡其紀上元以攝提格之歲與營室晨
出東方至角而入與營室夕出西方至角而入與
角晨出入畢與角夕出入畢與畢晨出入箕與畢
夕出入箕與箕晨出入柳與箕夕出入柳與柳晨
出入營室與柳夕出入營室凡出入東西各五爲
八歲二百三十日復與營室晨出東方其大率歲
一周天其始出東方行遲率日半度一百二十日
必逾行一二舍上極而反東行行日一度半一百
二十日入其庫近日曰明星柔高遠日曰大囂剛
其始出西行疾率日一度半百二十日上極而行
遲日半度百二十日旦入必逾行一二舍而入其
庫近日曰太白柔高遠日曰大相剛出以辰戌入
以丑未當出不出未當入而入天下偃兵兵在外
入未當出而出當入而不入下起兵有破國其當

期出也其國昌其出東爲東入東爲北方出西爲
西入西爲南方所居久其鄉利疾甚鄉凶出西途
行至東正西國吉出東至西正東國吉其出不經
天經天天下革政小以角動兵起始出大後小兵
弱出小後大兵強出高用兵深吉淺凶庫淺吉深
凶日方南金居其南日方北金居其北日贏候王
不寧用兵進吉退凶日方南金居其北日方北金
居其南日縮候王有憂用兵退吉進凶用兵象太
白太白行疾疾行遲遲行角敢戰動搖躁躁國以
靜靜順角所指吉反之皆凶出則出兵入則入兵
赤角有戰白角有喪黑圓角憂有水事青圓小角
憂有木事黃圓和角有土事有年其已出三日而
復有微入入三日乃復盛出是謂奕其下國有軍
敗將北其已入三日又復微出出三日而復盛入
其下國有憂師有糧食兵革遺人用之卒雖衆將
爲人虜其出西失行外國敗其出東失行中國敗
其色大圓黃澤可爲好事其圓大赤兵盛不戰太
白白比狼赤比心黃比參左肩蒼比參右肩黑比
奎大星五星皆從太白而聚乎一舍其下之國可
以兵從天下居實有得也居虛無得也行勝色色

勝位有位勝無位有色勝無色行得盡勝之出而
留桑榆間疾其下國上而疾未盡其日過參天疾
其對國上復下下復上有反將其入月將僂金木
星合光其下戰不合兵雖起而不鬪合相毀野有
破軍出西方昏而出陰陰兵強暮食出小弱夜半
出中弱鷄鳴出大弱是謂陰陷於陽其在東方乘
明而出陽陽兵之疆鷄鳴出小弱夜半出中弱昏
出大弱是謂陽陷於陰太白伏也以出兵兵有殃
其出卯南南勝北方出卯北北勝南方正在卯東
國利出西北北勝南方出酉南南勝北方正在酉
西國勝其與列星相犯小戰五星大戰其相犯太
白出其南南國敗出其北北國敗行疾武不行文
色白五芒出蚤爲月蝕晚爲天矢及彗星將發其
國出東爲德舉事左之迎之吉出西爲刑舉事右
之背之吉反之皆凶太白光見景戰勝晝見而經
天是謂爭明疆國弱小國疆女主昌亢爲疏廟太
白廟也太白大臣也其號上公其他名殷星大正營
星觀星宮星明星大衰六澤終星大相天浩序星
月緯大司馬位謹候此

察日辰之會以治辰星之位曰北方水太陰之精

主冬日壬癸刑失者罰出辰星以其宿命國是正
四時仲春春分夕出郊奎婁胃東五舍爲齊仲夏
夏至夕出郊東井輿鬼柳東七舍爲楚仲秋秋分
夕出郊角亢氐房東四舍爲漢仲冬冬至晨出郊
東方與尾箕斗牽牛俱西爲中國其出入常以晨
戌丑未其蚤爲月蝕晚爲彗星及天矢其時宜效
不效爲失追兵在外不戰一時不出其時不和四
時不出天下大饑其當效而出也色白爲旱黃爲
五穀熟赤爲兵黑爲水出東方大而白有兵於外
解常在東方其赤中國勝其西而赤外國利無兵
於外而赤兵起其與太白俱出東方皆赤而角外
國大敗中國勝其與太白俱出西方皆赤而角外
國利五星分天之中積于東方中國利積于西方
外國用者利五星皆從辰星而聚于一舍其所舍
之國可以法致天下辰星不出太白爲客其出太
白爲主出而與太白不相從野雖有軍不戰出東
方太白出西方若出西方太白出東方爲格野雖
有兵不戰失其時而出爲當寒反溫當溫反寒當
出不出是謂擊卒兵大起其入太白中而上出破
軍殺將客軍勝下出客亡地辰星來抵太白太白

不去將死正旗上出破軍殺將客勝下出客亡地
視旗所指以命破軍其繞環太白若與鬪大戰客
勝免過太白間可減劔小戰客勝免居太白前軍
罷出太白左小戰摩太白有數萬人戰主人吏死
出太白右去三尺軍急約戰青角兵憂黑角水赤
行窮兵之所終免七命曰小正辰星天攬安周星
細爽能星鈎星其色黃而小出而易處天下之文
變而不善矣免五色青圓憂白圓喪赤圓中不平
黑圓吉赤角犯我城黃角地之爭白角號泣之聲
其出東方行四舍四十八日其數二十日而反入
于東方其出西方行四舍四十八日其數二十日
而反入于西方其一候之營室角畢箕柳出房心
間地動辰星之色春青黃夏赤白秋青白而歲熟
冬黃而不明卽變其色其時不昌春不見大風秋
則不實夏不見有六十日之旱月蝕秋不見有兵
春則不生冬不見陰雨六十日有流邑夏則不長
角亢氐交州房心豫州尾箕幽州斗江湖牽牛婺
女楊虛危青州營室至東壁并州奎婁胃徐州昴
畢冀州觜觿參益州東井輿鬼雍州柳七星張三
河翼軫荊州七星爲貞官辰星廟蠻夷星也

兩軍相當日暈暈等力鈞厚長大有勝薄短小無
勝重抱大破無抱爲和背不和爲分離相去直爲
自立立候王指暈若曰殺將負且戴有喜園在中
中勝在外外勝青外赤中以和相去赤外青中以
惡相去氣暈先至而後去居軍勝先至先去前利
後病後至後去前病後利後至先去前後皆病居
軍不勝見而去其發疾雖勝無功見半日以上功
大白虹屈短上下允有者下大流血日暈制勝近
期三十日遠期六十日其食食所不利復生生所
利而食益盡爲主位以其直及日所宿加以日時
用命其國也

月行中道安寧和平陰間多水陰事外北三尺陰
星北三尺太陰大水兵陽間驕恣陽星多暴獄太
陽大旱喪也角天門十月爲四月十一月爲五月
十二月爲六月水發近三尺遠五尺犯四輔輔臣
誅行南北河以陰陽言旱水兵喪月蝕歲星其宿
地饑若亡熒惑也亂填星也下犯上太白也疆國
以戰敗辰星也女亂食大角主命者惡之心則爲
內賊亂也列星其宿地憂月食始日五月者六六
月者五五五月復六六月者一而五月凡五百一十

三月而復始故月蝕常也日蝕爲不滅也甲乙四海之外日月不占丙丁江淮海岱也戊巳中州河濟也庚辛華山以西壬癸恒山以北日蝕國君月蝕將相當之

國皇星大而赤狀類南極所出其下起兵兵彊其衝不利

昭明星大而白無角乍上乍下所出國起兵多變五殘星出正東東方之野其星狀類辰星去地可六丈大賊星出正南南方之野星去地可六丈大而赤數動有光

司危星出正西西方之野星去地可六丈大而白類太白獄漢星出正北北方之野星去地可六丈大而赤數動察之中青此四野星所出出非其方其下有兵衝不利

四填星所出四隅去地可四丈

地維咸光亦出四隅去地可二丈若月始出所見下有亂亂者亡有德者昌

燭星狀如太白其出也不行見則滅所燭者城邑亂如星非星如雲非雲命曰歸邪歸邪出必有歸國者星者金之散氣本曰火星衆國吉少則凶漢

者亦金之散氣其本曰水漢星多多水少則旱其
大經也 天鼓有音如雷非雷音在地而下及地
其所往者兵發其下

天狗狀如大奔星有聲其下止地類狗所墮及炎
火望之如火光炎炎衝天其下圜如數頃田處上
兌者則有黃色千里破軍殺將

格澤星者如炎火之狀黃白起而上下大上兌其
見也不種而獲不有土功必有大害

蚩尤之旗類彗而後曲象旗見則王者征代四方
旬始出於北斗旁狀如雄鷄其怒青黑象伏鼈枉
矢類大流星地行而倉黑望之如有毛羽然長庚
如一疋布著天此星見兵起

星墜至地則石也河濟之間時墜星

天精而見景星景星者德星也其狀無常常出于
有道之國

凡望雲氣仰而望之三四百里平望在桑榆上餘
二千里登高而望之下屬地者三千里雲氣有獸
居上者勝自華以南氣下黑上赤嵩高三河之郊
氣正赤恒山之北氣下黑上青勃碣海岱之間氣
皆黑江淮之間氣皆白徒氣白土功氣黃車氣乍

高乍下往往而聚騎氣卑而布卒氣搏前卑而後
高者疾前方而高後兌而卑者郤其氣平者其行
徐前高而後卑者不止而反氣相遇者卑勝高兌
勝方氣來卑而循車通者不過三四日去之五六
里見氣來高七八尺者不過五六日去之十餘二
十餘里見氣來高丈餘二丈者不過三四十日去
之五六十里見稍雲精白者其將悍其士怯其大
根而前絕遠者當戰青白其前低者戰勝其前赤
而仰者戰不勝陣雲如立垣杼雲杼軸雲搏兩
端兌杓雲如繩者居前亘天其半半天其蜚者類
闕旗故鉤雲句曲諸此雲見以五色合占而澤搏
密其見動人乃有占兵必起合闕其直王朔所候
決於日旁雲氣入主象皆如其形以占故北夷之
氣如羣畜穹閭南夷之氣類舟舩幡旗大水處敗
軍場破國之虛下有積錢金寶之上皆有氣不可
不察海旁蜃氣象樓臺廣野氣成宮闕然雲氣各
象其山川人民所聚積故候息耗者入國邑視封
疆田疇之正治城郭室屋門戶之潤澤次至車服
畜產精華實息者吉虛耗者凶若煙非煙若雲非
雲郁郁紛紛蕭索綸困是謂卿雲卿雲見喜氣也

若霧非霧衣冠而不濡見則其域被甲而趨天雷
電蝦虹辟歷夜明者陽氣之動者也春夏則發秋
冬則藏故候者無不司之天開縣物地動坼絕山
崩及徙川塞谿壅水澹澤竭地長見象城郭門閭
閨臬枯橐官廟邸第人民所次謠俗車服觀民飲
食五穀草木觀其所屬倉府廩庫四通之路六畜
禽獸所產去就魚鼈鳥鼠觀其所處鬼哭若呼其
人逢僂化言誠然

日月五星行度

吾學編夫天文七曜三垣二十八宿爲大聖人觀
天文以察時變觀此也此其有恒之象也雲雨震
電風雪霜露類皆天象而非其恒也彗孛虹珥之
類其怪也夫日大明陽之精光君象也月夜明陰
之精光后妃象也上有失德則適見于天而薄食
日食陽不勝陰也月食陰不讓陽也先王謹天戒
莫嚴于日食矣春秋二百四十二年而日食三十
六日官失之也日輪大月較小日道近天在上月
道近人在下水行最速一瀉千里金行於世其流
如泉火三月而改木一歲而彫土博厚不遷故金
水附日歲一周天火二歲木十二歲土二十八歲

一周年土亦名填讀如鎮以填靜爲體讀如田以填塞爲用也木星八十三年而與日合者七十六火七十九年而與日合者三十七土五十九年而與日合者五十七金水雖隨日然金八年而合於日者五水四十六年而合於日者一百四十五三垣曰天市明堂位也曰太微朝廷位也曰紫微宮寢位也明堂位者天子巡狩之居也朝廷位者聽政之居也宮寢位者燕息之居也天市歲臨之太微日臨之紫微朝夕在焉七曜遵黃道歷天街歲一受事太微而出猶大臣受天子之命於朝以行其職也二十八宿分列四方各守其野率諸經星以共紫微之帝猶郡國百司各治其職安其民人以承天子也二十八宿者蒼龍白虎朱雀玄武各七宿也角主發育萬物亢曰疏廟氏爲天根房天子之後寢鍵閉鈞鈐兩咸以防淫而謹內也心天子象言天地之心人之主也尾主后妃叙御于主所箕承帚掃又揚穀之器尾而受之以箕示婦道也五星聚箕尾而有天寶之亂亂自色荒也斗主薦賢受祿斗爲噐量所以斟酌也民事莫重於耕織故牛女相聯牛農丈人耕具驪珠女獻工也天

田九星象并田狗天鷄教樹畜也羅堰九坎天淵
言農桑者先水利也北陰也故虛與危主死喪危
禍事室以農畢而見故主營建宮室事壁圖書之
秘府奎天子武庫婁主蕃牧犧牲以供祀事自室
以至于婁天子之宮館苑囿在焉胃儲藏五穀之
府昴主刑獄又名旄頭占胡人順逆畢主邊兵昴
畢之間有天街分華夷也參中三星中軍其中大
將旁參謀也二肩左右將軍二足前後將背行軍
之藏府井主水泉主水衡法令平中之事物之平
者莫如水故營國制城畫堦分州皆取象焉鬼主
內外祠祀事柳主草木又爲天厨主饗燕事星爲
文明之會主衣裳文綉張主珍寶宗廟服用翼天
子之樂府也軫主車騎任載又星搖星隕大異凌
犯守留芒角掩各以類占之若乃日之行道周天
如循環月亦然兩環兩交一謂天首一謂天尾天
尾爲計天首爲羅月行遲速有常度最遲之處卽
孛也故謂之月孛孛六十二年而七周天孛生於
閏二十八年十閏而炁行一周天炁孛皆有度數
無光象故與羅計同謂之四餘并七政爲十一也

分野

周禮保章民以星土辨九州之地所封封域各有
分星以觀妖祥春秋傳參爲晉星商主大火國語
歲之所在則有周之分野傳云星紀吳越也玄枵
齊也姪訾衛也降婁魯也大梁趙也實沈晉也鶉
首秦也鶉火周也鶉尾楚也壽星鄭也大火宋也
析木燕也若謂受封之國春秋戰國固宜占之乃
後世占之而妖祥亦應此又何也攷之傳記梓慎
曰陳太皞之墟也鄭祝融之墟也皆火房也衛高
陽之墟其星爲大水鄭子產曰高辛氏有二子伯
曰閼伯遷于商丘主辰商人是因故辰爲商星季
曰實沈遷于大夏主參晉人是因故參爲晉星周
史伯曰楚重黎之後黎爲高辛氏火正是鶉尾楚
之分星也爾雅曰析木謂之津釋者謂天漢之津
梁是析木燕之分星也傳謂參爲晉星商主大火
然則分星者先王之所分雖改姓易世而所分自
若也其曰地之所在東西南北相反固不足以知
先王命祀之意而歲之所在僅爲一歲之占者亦豈
知分星者哉其他二十八宿之分野若史記天官
書二十八舍主十二州角亢氐房心豫尾箕幽
斗江湖牽牛婺女揚虛危青營室東壁并奎婁胃

徐昂畢冀觜觿參益東井輿鬼雍柳七星張三河
翼軫荆淮南子角亢鄭至翼軫楚漢志昂畢間爲
天街其陰陰國陽陽國執文志有海中二十八宿
國分臣分各二十八卷是也五星之分野若天官
書秦之彊候太白占狼弧吳楚候熒惑占鳥衡燕
齊候辰星占虛危宋鄭候歲星占房心晉亦候辰
星占參觜中國在東南爲陽日歲星熒惑填星占
於街南畢主之西北胡貉旃裘引弓之民爲陰月
太白辰星占於街北昂主之秦晉好用兵復占太
白胡貉數侵掠獨占辰星續漢志注星經歲星主
泰山徐青兗熒惑主霍山楊荆交鎮星主嵩高豫
太白主華陰山涼雍益辰星主常山冀幽并唐志
岱宗歲星位焉至嵩丘鎮星位焉是也北斗之分
野若天官書杓自華以西南衡殷中州河濟之間
魁海岱以東北星經玉衡一徐二益三冀四荆五
兗六揚七豫八幽九并春秋緯文耀鉤雍屬魁冀
屬樞兗青機徐楊權荆衡梁開豫搖晉志一秦二
楚三梁四吳五燕六趙七齊唐志杓以治外故鶉
尾爲南方負海之國魁以治內故陬訾爲中州四
戰之國是也干支之分野若天官書甲乙四海之

外丙丁江淮海岱戊巳中州河濟庚辛華山以西
壬癸常山以北淮南子甲齊乙東夷丙楚丁南夷
戊魏巳韓庚秦辛西夷壬衛癸越子周丑翟寅楚
卯鄭辰晉巳衛午秦未宋申齊酉魯戌趙亥燕漢
志壬燕趙癸北夷辰邯鄲未中山戌吳越亥燕代
星經玉衡第一星以五子日候之二亥三戌四卯
五辰六巳七午八寅九申是也河漢之分野若漢
志南戒爲越門北戒爲胡門唐志山河之象存兩
戒觀兩河之象與雲漢所始終是也諸星之分野
若晉志東區青丘隋志齊趙鄭越周秦代晉韓魏
楚燕之星是也紛紛籍籍不可枚舉惟知先王命
祀之意則分野之說可得而言矣

雲漢

天漢起東方經箕尾之間謂之天河亦謂之漢津
乃分爲二道其南經傳說魚淵天崙天弁河鼓其
北經龜貫箕下次絡南斗魁左旗至天津下而合
南道乃西南行又分夾匏瓜絡人星杵造父騰虹
王良附路閣道北端天陵天船卷舌而南行絡五
車經北河之南入東井水位而東南行絡南河闕
丘天狗天紀天稷在七星南而沒張衡曰津漢者

金之氣也其本曰水漢中星多則水星少則旱

天象怪異

春秋以來日月星辰之變學者多能記之乃若浮屠氏書所叙二日兩月乃至暈瑠珞玦彗孛飛流負珥虹蜺之類以爲同分罔見但此國見彼國本所不見亦復不聞殆其惡緣所感而致學者多疑之然唐貞觀初突厥有五曰三月之異中國亦莫之見與浮屠氏書所載不異今星曆家言盡西必占狼星極南必占斗又以聲教所不暨占皆爲狗國似未可易言也

日月纏度

天與日月皆自子年子月子子日子子時正一刻從子位之半左旋歷丑寅而升周天三百六十五度有奇天行速每日一周而過一度月行遲每日常不及天十三度有奇獨日一日一周天視月爲過視天爲不及今曆法日纏每一月退一次不知惟天行日過冬至析木星宿從卯辰進而在子非日退于寅位析木次也故堯時冬至日纏虛女之交今纏箕宿從卯辰進而在子非日退于寅位之箕也又謂月纏每一日退一次此乃日纏月所退處日

月合朔之所每日子半到此謂之月纏則可獨日
 纏總之在子無有所謂退一次也者祿命家以為
 實實在此而執以起命宮誤矣况二十八宿每日
 旋轉每一季移一方祿命家又執以分命度
 誤矣



